

四庫全書

子部

欽定四庫全書

子部

藝文類聚卷二十六

詳校官中書_臣李彤

員外郎_臣牛稔文覆勘

總校官知縣_臣楊懋珩

校對官中書_臣李奎

膳錄監生_臣孫慰祖

欽定四庫全書

藝文類聚卷二十六

唐 歐陽詢 撰

人部十

言志

言志

尚書曰詩言志

禮記曰志之所至詩亦至焉詩之所至樂亦至焉

毛詩序曰詩者志之所之也在心為志發言為詩

論語曰顏淵季路侍子曰盍各言爾志子路曰願車馬

衣輕裘與朋友共敝之而無憾顏回曰願無伐善無施勞子路曰願聞子之志子曰老者安之朋友信之少者懷之又子曰飯蔬食飲水曲肱而枕之樂亦在其中矣不義而富且貴於我如浮雲又曰葉公問孔子於子路子路不對子曰女奚不曰其為人也發憤忘食樂以忘憂不知老之將至云爾又曰子路曾皙冉有公西華侍坐子曰居則曰不吾知也如或知爾則何以哉子路率爾而對曰千乘之國攝乎大國之間加之以師旅因之

以饑饉由也為之比及三年可使有勇且知方也夫子
哂之求爾何如對曰方六七十如五六十求也為之比
及三年可使足民如其禮樂以俟君子赤爾何如對曰
非曰能之願學焉宗廟之事如會同端章甫願為小相
焉點爾何如鼓瑟希鏗爾舍瑟而作對曰異乎三子者
之撰子曰何傷乎亦各言其志也曰暮春者春服既成
冠者五六人童子六七十人浴乎沂風乎舞雩詠而歸夫
子喟然歎曰吾與點也

家語曰孔子北遊登于農山之上子路子貢顏回侍側
孔子四望喟然而歎曰於此致思無所不至矣二三子
各言其志吾將擇焉子路進曰願得白羽若月赤羽若
日鐘鼓之音上振於天旌旗繽紛下蟠於地由當一隊
而敵之搢旗執馘惟由能之使夫二子從我焉夫子曰
勇哉子貢曰賜願使齊楚合戰兩壘相當旗鼓相望埃
塵連接促刃交兵賜著縞衣白冠陳說其間推論利害
二國釋患唯賜能之使夫二子從我焉夫子曰辯哉顏

回曰回聞薰蕕不同器而藏堯桀不共國而治以類異也回願得明王聖主而相之敷其五教遵之禮樂使城郭不修溝洫不越鑄兵刃為農器放牛馬於原藪室家無怨曠之思千載無戰鬪之患則由無所施其勇而賜無所用其辯矣夫子慄然曰美哉德也不傷財不害民不繁辭則顏氏之子有焉

孝經鉤命決曰孔子曰吾志在春秋行在孝經以春秋屬商以孝經屬參

史記曰陳涉嘗與人傭耕輟耕於壟上悵悵久之曰苟富貴無相忘傭者笑而應之曰若為傭耕何富貴乎涉太息曰嗟乎燕雀安知鴻鵠之志哉

漢揚雄自叙曰雄為人簡易佚宕默而好深湛之思清淨無為少嗜慾不汲汲於富貴不戚戚於貧賤不修廉隅以徼名當世無擔石之儲晏如也自有大度非聖哲之書不好也非其意雖富貴不事也

東觀漢記初光武適新野聞陰后美心悅之後至長安

見執金吾甚盛因歎曰仕宦當作執金吾娶妻當得陰麗華

後漢書馬少遊謂其從兄援曰士生一世但取衣食裁足乘下澤車御款段馬守墳墓鄉里稱善人斯可矣又曰馮衍有大志不戚戚於貧賤常慷慨歎曰衍少事名賢經歷顯位懷金垂紫竭節奉使不求苟得常有凌雲之志三公之貴千金之富不得其願不繫於懷貧而不衰賤而不恨年雖疲曳猶庶幾名賢之風脩道德於幽

冥之路以終身名為後世法又曰班超字仲叔家貧傭書以供養久乃投筆而歎曰大丈夫無他志略猶當如傅子介張騫立功異域以取封侯安能久事筆硯間乎又曰梁竦字敬叔自負其才鬱鬱不得其意登山遠望嘆息曰大丈夫生當封侯死當廟食如不然閒居足以養志詩書足以自娛州郡之職但勞人耳又曰仲長統字公理常欲卜居清曠以樂其志曰濯清水追涼風鉤遊鯉弋高鴻不受當世之責永保性命之期則可以凌

雲霄出宇宙之外矣

張璠漢紀曰孔融拜大中大夫雖居家失勢賓客日滿其門愛才樂士常若不足每歎曰坐上賓常滿尊中酒不空吾無憂矣

吳書曰鄭泉博學有奇姿而性嗜酒閒居每曰願得美酒滿五百斛船以四時甘肥置兩頭反覆沒飲之憊即住而啖肴膳酒有升斗減隨即益之不亦快乎

晉中興書曰畢卓為吏部郎常謂人曰右手持酒杯左

手持蟹螯拍浮酒池中便足了一生

詩魏陳思王曹植詩曰慶雲未時興雲龍潛作魚神鸞
失其儔還從燕雀居

阮籍詠懷詩曰天地烟煴元精代序清陽曜靈和氣容
與於赤帝朝伊衡作輔才非允文器非經武適彼沅湘
託介漁父優哉游哉爰居爰處又曰月明星稀天高地
寒嘯歌傷懷獨寐寤言臨觴拊膺對食忘食世無萱草
令我哀歎又曰河上有丈人緯蕭棄明珠甘彼藜藿食

樂是蓬蒿廬豈效續紛子良馬騁輕輿朝生衢路旁夕
瘞橫街隅歌笑不終宴俛仰復欹歔鑒茲二三者憤懣
從此舒又幽蘭不可佩朱草為誰榮修竹隱山陰射干
臨增城又曰駕言發魏都南向望吹臺簫管有遺音梁
王安在哉戰士食糟糠賢者處蒿萊歌舞曲未終秦兵
復已來又曰木槿榮丘墓煌煌有光色白日頽林中翩
翩零路側蟋蟀吟戶牖蟋蟀鳴荆棘蟬蛸玩三朝采采
循羽翼又曰一日復一日一夕復一晨容色改平常精

魂自飄淪臨觴多哀楚思我故情人對酒不能言悽愴
懷酸辛又曰鴻鵠相隨飛隨飛適荒裔雙翮臨長風須
臾萬里逝朝食琅玕實夕宿丹山際託身青雲中網羅
不能制豈與鄉曲士攜手共言誓又曰鸞鳩飛桑榆海
鳥運天池豈不識宏大羽翼不相宜招搖安可翔不若
栖樹枝下集蓬蒿間上遊園囿籬但爾亦自足用子為
追隨又曰嘉樹下成蹊東園桃與李秋風吹飛藿零落
從此始繁華有憔悴堂上生荆杞又曰天馬出西北由

來從東道春秋非有託富貴焉常保清露被臯蘭凝霜
霑野草又曰平生少年時輕薄好絃歌西遊咸陽中趙
李相經過娛樂未終極白日忽蹉跎驅馬復來歸反顧
望三河黃金百鎰盡資用常苦多北臨太行道失路將
如何又曰步出上東門北望首陽岑下有採薇士上有
嘉樹林良辰在何許凝霜霑衣襟寒風振山岡玄雲起
重陰鳴雁飛南征鶚鵠發哀音素質遊商聲悽愴傷我
心又曰昔年十四五志尚好詩書被褐懷珠玉顏閔相

與期開軒臨四野登高望所思丘墓蔽山岡萬世同一
時千秋百歲後榮名安所之又曰徘徊逢池上還顧望
大梁淥水揚洪波曠野漭茫茫又曰寧與燕雀翔不隨
黃鵠飛黃鵠游四海中路將安歸又曰北里多奇舞濮
上有微音輕薄閒遊子俯仰乍浮沉焉見王子喬乘雲
翔鄧林獨有延年術可用慰我心又曰南國有佳人容
華若桃李朝遊江北岸夕宿瀟湘沚時俗薄朱顏誰為
發皓齒又曰夜中不能寐起坐彈鳴琴薄帷鑒明月清

風吹我襟孤鴻號外野翔鳥歸北林徘徊將何見憂思
獨傷心

晉傅玄雜詩曰門夜微風起明月照高臺清響呼不應
玄景招不來厨人進藿茹有酒不盈杯安貧福所與富
貴為禍媒金玉雖高堂於我賤蒿萊

晉張翰詩曰暮春和氣應白日照園林青條若總翠黃
花如散金榮與壯俱去賤與老相尋又東鄰有一樹三
紀栽可拱無花復無實亭亭雲中竦隙禽不為巢短翮

莫肯任又忽有一飛鳥五色雜英華一鳴衆鳥至再鳴
衆鳥羅長鳴搖羽翼百鳥互相和

晉張協詩曰瓠瓠夸璵璠魚目笑明月不見郢中歌能
否居然別陽春無和者巴人皆下節又曰此鄉非吾地
此郭非吾城折衝樽俎間制勝在兩楹巧遲不足稱拙
速乃垂名

宋謝靈運憶山中詩曰採菱調易急江南歌不緩楚人
心昔絕越客腸今斷斷絕雖殊念俱為歸慮款又曰韓

亡子房奮秦帝魯連恥本自江海人忠義感君子

宋謝惠連詩曰夕坐苦多慮行歌踐閨中房櫳引傾月
步檐結春風

宋鮑照雜詩曰十五諷詩書篇翰靡不通弱冠參多士
飛步遊春宮側覩君子論預見古人風兩說窮舌端五
車摧筆鋒羞當白璧貺恥受聊城功晚節從世務乘障
遠和戎解珮襲犀渠卷帙奉盧弓始願力不及安知命
不終

齊謝朓冬緒羈懷詩曰去國懷丘園入遠滯城闕寒燈
耿宵夢清鏡悲曉髮風草不留霜冰池共如月

梁江淹效阮公詩曰歲暮懷感傷中夕弄清琴戾戾曙
風急團團明月陰愁雲出北山宿鳥驚東林誰謂人道
曠憂慨自相尋寧知霜雪後獨見松柏心又曰十五學
詩書顏華常美好不逐世間人鬪難東郊道富貴如浮
雲金玉不為寶一旦鵲鳩鳴嚴霜被勁草志氣多感失
泣下霑懷抱又曰夕雲映西山蟋蟀吟桑梓零落被百

草秋風吹桃李君子懷苦心感慨不能止
駕言遠行遊
驅馬清河溪寒暑更進退金石有終始
光色俯仰間英
艷難久恃

梁吳均詠懷詩曰僕本報恩人走馬救東秦
黃龍暗迢
遞青泥寒苦辛野戰劒鋒盡攻城才智貧
唯餘一死在
留持贈主人又曰元淑勢位卑長卿宦情寡
二頃且營
田三錢聊飲馬懸風白雲上挂月青山下
心中欲有言
未得忘言者

周庾信詠懷詩曰步兵未飲酒中散未彈琴蕭索無貞
氣昏昏有欲心涸鮒常思水驚飛每失林風雲能變色
松竹且悲暗由來不得意何必往長岑又曰無悶無不
悶有待何可待昏昏如坐霧漫漫疑行海千年水未清
一代人先改昔說東陵侯唯見瓜園在又曰疇昔國士
遇生平知己恩直言殊可吐寧知炭欲吞一顧重尺璧
千金輕一言悲傷劉孺子悽愴史皇孫無因同武騎歸
守灞陵園又曰周王逢鄭忿楚后值秦寬梯衝已鶴列

冀馬忽雲屯武安檐瓦振昆陽猛獸奔流星夕照境烽
火夜燒原古獄饒冤氣空亭多枉魂天道或可問微子
不忍言又曰蕭條亭鄣遠悽愴風塵多關門臨白狄城
影入黃河秋風別蘇武寒水送荆軻唯言氣蓋世晨起
帳中歌

隋顏之推古意詩曰十五好詩書二十彈冠仕楚王賜
顏色出入章華裏作賦凌屈原讀書誇左史數從明月
讌或侍朝雲祀登山摘紫芝泛江採綠芷歌舞未終曲

風塵闇天起吳師破九龍秦兵割千里狐兔穴宗廟霜露
霑朝市壁入邯鄲官劒去襄城水不獲殉陵墓獨生良
足恥憫憫思舊都惻惻懷君子白髮窺明鏡憂傷沒余
齒又曰寶珠出東國美玉產南荆隋侯曜我色卞氏飛
吾聲已加明稱物復飾夜光名驪龍旦夕駭白虹朝暮
生華彩燭兼乘價直距連城常悲黃雀起每畏靈蛟迎
千刃安可捨一毀難復營昔為時所重今為時所輕願
與濁泥會思將垢石并歸真川岳下抱潤潛其榮

賦後漢馮衍顯志賦曰馮子以大人之德不碌碌如玉
砢砢如石風興雲蒸一龍一蛇合道翱翔與時變化夫
豈守一節哉上隴阪騰高岡遊精宇宙流目八紘眇然
有思凌雲之意乃作賦自廣命篇曰顯志云間歲發春
百卉含英甲子之朝兮汨吾西征發軔新豐兮徘徊鎬
京凌飛廉而太息登平陽而懷傷悲世俗之險阨哀好
惡之無常棄衡石而意量兮隨風波而飛揚涉九峻而
臨截薛聽涇渭之波聲歲忽忽而日邁兮壽冉冉而不

與恥功業之無成兮赴原野而窮處陟隴山以踰望眇
然覽於八荒風波飄其並興兮情惆悵而增傷覽天地之
幽奧兮統萬物之維綱究陰陽之變化兮昭五德之精
光高吾冠之岌岌兮長吾珮之洋洋飲六醴之清液食
五芝之茂英嘉孔丘之知命兮大老聃之貴榮玄德與
道其孰能寶名與身其孰親

後漢班固幽通賦曰系高項之玄胄兮氏中葉之炳靈
飄凱風而蟬蛻兮雄朔野以颺聲皇十紀而鴻漸兮有

羽儀於上京魂煢煢與神交兮精誠發於宵寐夢登山
而迴眺兮覲幽人之髣髴惟天地之無窮兮鮮民生之
晦在紛屯遭與蹇連兮何艱多而智寡昔衛叔之御昆
兮昆為寇而喪予管彎弧欲斃讎兮讎作后而成己變
化故而相詭兮孰云豫其終始雍造怨而先賞兮丁繇
惠而被戮栗取弔於由吉兮王膺慶於所感叛迴宄其
若茲兮北史頗識其倚伏宣曹興於下夢兮魯衛名諡
於銘謠妣聆呱而刻石兮許相理而鞠條道混成而自

然今術同源而分流所貴聖人之至論兮順天性而斷
誼物有欲而不居兮亦有惡而不避三仁殊而一致兮
夷惠異而齊聲木偃息以藩魏兮申重蘭而存荆紀焚
躬以衛上兮皓頤志而弗傾俟草木之區別兮苟能實
其必榮要沒世而不朽乃先民之所程觀天網之絃覆
兮實匪謔而相訓謨先聖之大猷兮亦鄰德而助信虞
韶美而儀鳳兮孔忘味於千載素文信而底麟兮漢賓
祚于異代

魏陳王曹植玄暢賦曰夫富者非財也貴者非寶也或有輕爵祿而重榮聲者或有授性命以殉功名者是以孔老異旨楊墨殊義聊作斯賦名曰玄暢夫何希世之大人罄天壤而作皇該仁聖之上義據神位以統方補五帝之漏目綴三代之維綱僥余生之倖祿邁九二之嘉祥上同契於稷卨降合韻於伊望思薦寶以繼佩怨和璞之始鑄思黃鍾以協律怨伶夔之不存考所圖之莫合悵蘊結而延佇志鵬舉以補天蹶青雲而奮羽舍

余駟而改駕任中才之展御望前軌而致策顧後乘而
安驅匪逞邁之短脩取全真而保素弘道德而為宇築
無怨以作藩播慈惠以為圃耕柔順以為田不媿景而
慙魄信樂天之何欲逸千載而流聲超貴黎而度俗又
幽思賦曰倚高臺之曲岵處幽僻之閒深望翔雲之悠
悠羌朝霽而夕陰顧秋華之零落感歲暮而傷心觀躍
魚於南沼聆鳴鶴乎北林搦素筆而慷慨揚大雅之哀
吟仰清風以歎息寄予思於悲絃信有心而在遠重登

高以臨川何余心之煩錯寧翰墨之能傳

魏劉楨遂志賦曰幸遇明后因志東傾披此豐草乃命
小生生之小矣何茲云當牧馬於路役車低昂愴惻
切我獨西行去峻溪之鴻洞觀日月於朝陽釋叢棘之
餘刺踐櫟林之柔芳皦玉粲以曜目榮日華以舒光信
此山之多靈何神分之煌煌聊且遊觀周歷高岑仰攀
高枝側身遺陰磷磷礧礧以廣其心伊天皇之樹葉必
結根於仁方稍吳夷於東隅掣叛臣乎南荆戢干戈於

內庫我馬繫而不行揚洪恩於無涯聽頌聲之洋洋四
寓莫以無為玄道穆以普將翼雋又於上列退仄陋於
下場襲初服之蕪歲託蓬廬以遊翔豈放言而云爾乃
旦夕之可忘

魏丁儀厲志詩曰覽前志而博觀求余心之所安雖疲
駑而才弱敢舍力而不攀懿躬稼之克在賤善射而隕
殘羨首陽之遺譽憎千駟之餘訕宗舍藏之偉節薄鼎
角之自干嘉法言之令揚悼說難之喪韓鑿登險之敗

績顧清道以自閑瞻亢龍而懼進退廣志於伐檀雖德
厚而祚卑猶不忘於盤桓薰以芬香而自燒兔亦取斃
於豪翰援大雅以為戒眺龔勝而自歎嗟世俗之參差
將未審乎好惡咸隨情而與議固真偽以紛錯穢杯盃
之周用令瑚璉以抗閭恨騾驢之進庭屏騏驎於溝壑
疾青蠅之染白悲小弁之靡託惡晨婦之蒙厚痛三代
之見薄惟受性之樸拙亮未達乎測度顧鍾子之既沒
牙輟絃而不作敦三思之彌憤動循墻之茲恪勉夕改

以補朝履日新而晦昨

魏韋鋌叙志賦曰肩鴻烈之末流蒙祖考之餘德奉過庭之明訓納微躬於軌則勉四民之耕耘遂能辯乎菽麥自弱冠而立朝無匡時之異才每寤寐以歎息思損已而降階遭大魏之革命罔羣士於行職雖固陋之無用猶收錄而序飾厯文武於機衡擁大璫於帝側隨倫儕以按牒乃剖符而封殖顧儀服而增憤心夕惕以愧惡蒙聖皇之宏恩過待罪於卿士奏朝請於朔望恭禋

享於郊祀念余年之冉冉忽一過其如馳微奇功以佐
時徒曠官其何為匪遜讓之足殉信神氣之稍衰將訴
誠於明后乞骸骨而告歸

晉夏侯惇懷思賦曰何天地之悠長悼人生之短淺思
縱慾以求歡苟抑沈以避免嗟聖王之制作所以貴夫
善善信循道以從法何世路之屯蹇始絜操以迄今每
適道而靡違思典言以攝事弗履過而循非恒戰戰以
矜慄杜穢釁而防微斂規節以踐跡冀天鑒之佑誠勤

恭肅以端厲常苦心而勞形桑榆淹其薄沒既白首而無成世務多故吾固甘夫無為名不足以為尚空勞穢以自卑永無事以安神故幸歿之無知

晉棗據表志賦曰據忝職門下在幃幄之末與羣士斜齊登玉陛待日月久矣出為冀州刺史犬馬戀主既有微情且志之所存不能無言因而賦之曰過承嘉惠擢身泰晨俯躡丹墀仰承三辰當樂夏之颯南蒙朱陽之和仁接鳴鸞之垂翼因神虬之光鱗浮眇末之纖質濟

吾身於天津邈盧敖之所涉階多士之遺塵登九垓之
虛軌覲汗漫之威神情飄飄而凌雲意髣髴于真人扶
搖薄於懸圃增城鬱以差莪被羽衣之飛飛握若蕙之
芳華蹈紉紛之絕軌攀大椿之踈柯意翹翹而慕遠思
濯髮於天波悲落葉之思條情戀戀於昊蒼懷聖德之
弘施情慘切而內傷感有莘之媵臣願致主於陶唐
晉潘尼懷退賦曰伊疇昔之懷憤思天飛以遠迹望循
塗而投軌逝翔風以理翮冀雲霧之可憑希天路之開

闢何時願之多違奄就羈以服役困吳坂之峻岨畏鹽
車之嚴英嗟遊處之弗遇奚鬱悵之難任背宇宙之寥
廓羅網罟之重深常屏氣以歛迹焉遊豫以娛心傳釋
板以亮殷望投竿而相姬窮獨善以全質達兼利以濟
時聃安志於柱史由抗跡於蒿箕理殊塗而同歸雖百
慮其何思敢因虛以託談遂逡巡而造辭

晉傳咸中懷賦曰何天施之弘普厠瓦礫於瓊瑛備東
宮之妙選奉儲君之聖明穆穆清禁濟濟羣英鸞翔鳳

集羽儀上京芬芳並發我穢其馨德音光宣我累厥聲
豈伊不媿顧影慙形雖自百於殞越懼恩隆而命輕命
既輕而才下諒無補於明時塞賢哲之顯路而塵損之
日滋匪耽榮而忘替實結戀之有違忍厚顏於寮類甘
獲戾而受譏不悟皇恩之彌崇授大縣乎近畿畿云近
而防遠情眷眷而含悲悲惻兼懷憂慮實深雍可南面
千載晞心微微小子斯之莫任莫斯之任求仁在我將
反初服畢志訓雅盡烏烏之至情竭歡敬於膝下進抗疏

以歸誠退抽簪而脂車庶所乞之克從永收迹於蓬蘆
晉曹攄述志賦曰慕浮雲以抗操耽簞食之自娛羨首
陽之皎節歎南山之高疏哀夫差之溷惑詠楚懷之失
圖悲伍員之沉悴痛屈平之無辜嘉沮溺之隱約羨接
輿之狂歌顧大雅之先智緯明哲之所經微見機而遂
逝比舍生而親名道殊塗而同歸要踰世而並榮舜拘
忤於焚廩孔怵惕於陳匡紛迭蹇之若斯何遭運之可
常情況惚以回迷夢乘雲而飛颺駕麟鳳之靡靡截龍

旂之洋洋周九州而騁目登四岳而永望承聖詰而砥礪奮羽儀而翱翔被蘭祀之芳華帶鍾山之玉英飾吾冠之岌岌美吾珮之玲玲悲盛衰之遞處情悠悠以紆結攬萱草以掩淚曾一歡而九咽

晉陸機遂志賦曰昔崔篆作詩以明道述志而馮衍又作顯志賦班固作幽通賦皆相依倣焉張衡思玄蔡邕玄表張叔哀系此前世之可得言者也崔氏簡而有情顯志壯而泛濫哀系俗而時靡玄表雅而微素思玄精

練而和惠欲麗前人而優游清典漏幽通矣班生彬彬
切而不絞哀而不怨矣崔蔡冲虛溫敏雅人之屬也衍
抑揚頓挫怨之徒也豈亦窮達異事而聲為情變乎余
備託作者之末聊復用心焉武定鼎於洛汭胡受罪於
汝墳繇鳴鳳於百祀啓敬仲乎方震苟天光之所照豈
舜族其必陳厭禋祀於故墟饗禴祭於東鄰禰八葉而
松茂舞九韶乎降神系姜叟於海曲表滄流以遠震仰
前蹤之綿邈豈孤人之能胄匪世祿之敢懷傷茲堂之

不構理或睽而後合道有夷而弗順傳栖巖而神交伊
荷鼎以自進蕭綢繆於豐沛故攀龍而先躍陳傾覆於
楚魏亦凌霄以自濯伍被刑而服劍魏和戎而擁樂彼
殊塗而並致此同川而偏溺禍無景而易逢福有時而
難學惟萬物之運動雖紛紜而相襲隨性類以曲成故
圓行而方立要信心而委命援前修以自呈擬遺迹於
成軌詠新曲於故聲任窮達以逝止亦進仕而退耕庶
斯言之不渝挹耿介以成名又懷土賦曰余去家漸久

懷土彌篤方思之殷何物不感曲街委巷罔不興詠水
泉草木咸足悲焉故述斯賦背故都之沃衍適新邑之
丘墟遵黃川以葺宇被蒼林而卜居悼孤生之已晏恨
親沒之何速排虛房而永念想遺塵其如玉眇綿邈而
莫覲徒佇立其焉屬感亡景於存物惋隕年於拱木悲
顧盼而有餘思俯仰而自足留茲情於江介寄瘁貌於
海曲玩通川以悠想撫歸塗而躑躅伊躑躅之徒勤慘
歸途之良難愍栖鳥於南枝弔離禽於別山念庭樹以

悟懷憶路草以解顏甘堇茶於飴此緯蕭艾其如蘭神
何寢而不夢形何興而不言

梁元帝玄覽賦曰歲次旃蒙月建司空變蕤賓之呂扇
廣莫之風蕭子褰帷九水作牧三宮乃盱衡而言曰唯
天為大唯堯則之唯地為厚唯王國之粵義皇之握鏡
實乃神而乃聖陳六聯於八則弘九職於三令惟天縱
於副后踰啓誦而為首既論儒而肅成復斷獄於長壽
爾其湘水之東即我龜蒙魏正元而分邑吳太平而定

中鎮鱗山之崔嵬，倚龍迹而穹窿，將遊目於五湖，夕結
覽於姑蘇，臨閭門之跨水，聳重闕而開都，觀泉亭之涌
波，窟巍巍而峩峩，張素蓋而紫洲，嶼馳白馬而赴江，施
登舜橋而延首，假禹井而淹留，御史之牀猶在，督護之
門不修，詳夫皇王爰處，本無定所，堯都平陽，舜在冀方，
商王居亳，成周卜洛，故知黃旗紫蓋，域中為大，天地之
所合，風雲之所會，爰八命而建旗，誠非親而勿居，應鳴
鞞於龍角，覆緹幕於熊車，經釣臺而高邁，過鄂渚而西

浮變青門之三襲為黃塵之一丘臨章華而留眄見舊
楚之淒涼試極目乎千里何春心之可傷其渚宮也夾
江帶阡布瀟井田通達交迸高門接連人腰水心之劍
家給火耕之田爾乃樹之榛栗椅桐梓漆三巴黃甘千
戶朱橘矧高晏於城隅駐五馬而踟躕乃有青琴碧玉
絳樹綠珠西河王豹東野綿駒蘭缸夕燃合璧斜天照
流風之迴雪映出水之初蓮奉信珪而入朝驅駿駟而
乘輅既總司於戍旅亦兼飾於豐紹幼墳籍以自娛迄

方今而不渝雲氣芝英之簡懸針倒薤之書擬河獻之
留真希淳于之席珍臨秋水之至樂登春臺而自欣鑒
戶牖而長望混木鴈而兼陳嗟今來而古往聊絕筆於
獲麟又言志賦曰天文既表人文可觀知負展之未易
信握鏡之云難差立極而補天驗璧合而珠連有庖犧
之八索稱朱襄之五絃聞夏王之鑄鼎重農皇之播田
雖車軌之未同亶彌媿於棟隆戮封豕於海內斬長狄
於區中懷宿昔之璵璠並來遊於兔園悲元瑜之已逝

歎靈光之獨存想延賓於北閣因直酒於南軒聞鶯鳴
而懷友聽長笛其何言夙有尚於清靜叨再入於郢鄢
東窺文命之穴南望洪崖之井遂撫運而登庸謬垂旒
而卷領雖有愧於前英每求衣於未明召司烜而照夜
觀執珪而滿庭誠雖休以勿休寔旨酒之忘憂絕何楊
之妙舞廢綿駒之善謳彼知止與知足復何營而何欲
柱何用於黃金案寧勞於青玉爾乃高步北園用蕩囂
煩柱偃蹇而臨棟石穹隆而架門對灌木之修聳觀激

水之飛奔澗不風而自響天無雲而晝昏聞賓鴻之夜
飛想過沛而霑衣况登樓而作賦望淮海而思歸

書漢司馬遷報任安書曰僕亦嘗廁下大夫之列陪奉
外廷末議不以此時引維綱盡思慮今已虧形為掃除
之隸在闡葺之中乃欲仰首伸眉論列是非不亦輕朝
廷羞當世之士邪僕與李陵俱居門下素非相善也趨
舍異路未嘗銜杯酒接殷勤之餘歡今舉事一不當而
全軀保妻子之臣隨而媒孽其短僕誠私心痛之且李

陵提步卒不滿五千深踐戎馬之地矢盡道窮救兵不
至士卒死傷如積然陵一呼勞軍士卒無不起張空拳
冒白刃北嚮爭死敵者愚以為李陵素與士大夫絕甘
分少能得人之死力雖古名將不過也身雖陷敗亦足
以暴於天下也適會召問即以此指推言陵之功欲以
廣主上之意塞睚眦之辭未能盡明明主不曉以為僕
沮貳師而為李陵遊說遂下於理奉拳拳之忠終不自
列交遊莫救視左右親近不為一言身非木石獨與法

吏為伍深幽囹圄之中誰可告愬者此真少卿所親見
僕行事豈不然乎且夫臧獲婢妾猶能引決况僕之不
得已乎所以隱忍苟活身幽糞土之中而不辭者鄙沒
世而文采不表於後世也古者富貴而名磨滅不可勝
記唯侗儻非常之人稱焉蓋西伯拘而演周易仲尼厄
而作春秋屈原放逐乃賦離騷左丘失明厥有國語孫
子臚脚兵法修列不韋遷蜀世傳呂覽韓非囚秦說難
孤憤詩三百篇大抵賢聖發憤之所為作也僕竊不遜

近自託於無能之辭網羅天下放失舊聞略考其行事
綜其終始稽其成敗興壞之紀欲以究天地之際通古
今之變成一家之言惜其不成是以就極刑而無愠色
僕誠已著此書藏之名山傳之其人通邑大都則僕償
前辱之責雖萬被戮豈有悔哉然此可為智者道難為
俗人言也

漢楊惲報孫會宗書曰惲家方隆盛時乘朱輪者十人
位在列卿爵為通侯總領從官與聞政事曾不能以此

時有所建明以宣德化已負竊位素餐之責久矣懷祿
貪勢不能自退遂遭變故橫被口語身幽北闕妻子滿
獄當此之時自以夷滅不足以塞責豈意得全首領復
奉先人之丘墓乎伏惟聖主之恩不可勝量君子游道
樂以忘憂小人全軀悅以忘罪竊自念過已大矣行已
虧矣長為農夫以沒世矣是故身率妻子戮力耕桑灌
田治產以給公上不意當復用此為譏議也田家作苦
歲時伏臘烹羊烹魚斗酒自勞家本秦也能為秦聲婦

趙女也雅善鼓瑟奴婢歌者數人酒後耳熱仰天撫缶而呼烏烏其詩曰田彼南山蕪穢不治種豆一頃落而為箕人生行樂耳須富貴何時是日也拂衣而起奮袖低昂頓足起舞誠淫荒無度不知其不可也憚幸有餘祿方糴賤販貴逐什一之利下流之人衆毀所歸不寒而慄雖雅知憚者猶隨風而靡尚何稱譽之有道不同不相為謀今子尚安得以卿大夫之制而責僕哉

魏文帝與吳質書曰季重無恙塗路雖局官守有限願

言之懷良不可任足下所治僻左書問致簡益用增勞
每念南皮之遊誠不可忘既妙思六經逍遙百氏彈琴
間設終以博奕高談娛心哀箏順耳馳騁北場旅食南
館浮甘瓜於清泉沈朱李於寒水白日既匿繼以朗月
同乘共載以遊後園輿輪徐動賓從無聲清風夜起悲
笳微吟樂往哀來愴然傷懷余顧而言斯樂難常足下
之徒咸以為然今果分別各在一方元瑜長逝化為異
物每一念至何時可言方今蕤賓紀時景風扇物天意

和暖衆果具繁時駕而遨遊北遵河曲從者鳴笳以啓
路文學託於後車節同時異物是人非我勞如何又曰
昔日遊處行則連輿立則接席何曾須臾相失每至觴
酌流行絲竹並奏酒酣耳熱仰而賦詩當此之時忽然
不自知樂也何圖數年之間零落略盡言之傷心頃撰
其遺文都為一集觀其姓名已為鬼錄追思昔遊猶在
心目而此諸子化為糞壤可復道哉歷覽諸子之文對
之杖淚既痛逝者行自念也年行已長大所懷萬端時

有所慮至乃通夕不瞑志意何時復類往昔邪已成老
翁但未白頭耳

魏陳王曹植與吳質書曰前日雖因常調得為密坐雖
宴飲彌日其於別遠會稀不盡其勞積也若夫觴酌凌
波於前笳簫發音於後足下鷹揚其體鳳翔虎視謂蕭
曹不足儔衛霍不足侔也左顧右盼謂若無人豈若吾
子之壯志哉過屠門而大嚼雖不得肉實且快意當斯
之時願舉太山以為肉傾東海以為酒伐雲夢之竹以

為笛斬泗濱之梓以為箏食若填巨壑飲若灌漏卮其
樂固難量豈非大丈夫之樂哉然日不我與曜靈急節
面有逸景之速別有參商之濶思抑六龍之首頓羲和
之轡折若木之華閉濛汜之谷天路高邈良無由緣
魏吳質答太子書曰奉讀手命追亡慮存恩哀之隆形
於文墨日月冉冉歲不我與昔侍左右廁坐衆賢出有
微行之遊入有管絃之歡置酒樂飲賦詩稱壽自謂可
終始相保並騁材力効節明主何意數年之間死喪略

盡臣獨何德以堪久長徐陳劉應才學所著誠如來命惜其不遂可謂痛切凡此數子於雍容侍從實其人也若乃邊境有虞羣下鼎沸軍書輳至羽檄交馳於彼諸賢非其任矣往者孝武之世文章為盛若東方朔枚臯之徒不能持論即阮陳之流也其唯嚴助壽王與聞政事然皆不慎其身善謀於國卒以敗亡臣竊恥之至於司馬長卿稱疾避事以著撰為務則徐生庶幾焉而今各逝已為異物又答陳思王曹植書曰信到奉所惠貺

發函伸紙是何文采之巨麗而慰喻之綢繆乎夫登東岳者然後知衆山之迤邐也奉至尊者然後知百里之卑微也身賤犬馬德輕鴻毛至乃歷玄關排金門升玉堂伏櫺檻於前殿臨曲池而行觴既威儀虧替言辭漏泄雖侍平原養士之懿愧無毛遂耀穎之才深蒙薛公折節之禮而無馮諼三窟之效屢獲信陵虛左之德又無侯生可述之美凡此數者乃質之所以憤積於胸襟懷眷而悵邑者也若追前宴謂之未究欲傾海為酒并山

為肴伐竹雲夢斬梓泗濱然後極雅意盡歡情信公子
之壯觀非鄙人之所庶幾也若質之志實在所天思投
印釋黻朝夕侍坐鑽仲父之遺訓覽老氏之要言對清
醑而不酌抑嘉肴而不享使西施出帷嫫母侍側斯盛
德之所蹈明哲之所保也若乃近者之觀實蕩鄙心秦
箏發徽二八迭奏塤簫激於華屋靈鼓動於座右耳嘈
嘈而無聞情踊躍於鞍馬謂可北懾肅慎使貢其楛矢
南震百越使獻其白雉又況權備夫何足視乎還治風

采所著觀省英瑋實賦頌之宗作者之師表也

晉羊祜與從弟書曰吾以布衣忝荷重任每以尸素為愧大命既隆唯江南未夷此人臣之責是以不量所能畢力吳會當憑朝廷之威賴士大夫之謀以余克之舉除萬世之患年已朽老既定邊事當有角巾東路還歸鄉里於墳墓側為容棺之墟假日視息思與後生味道此吾之至願也以凡才而居重位何能不懼盈滿以責邪疏廣吾師也聖主明恕當不奪微志爾

晉劉琨答盧諶書曰書及詩備辛酸之苦言暢經通之
遠旨執玩反覆不能釋手慨然以悲歡然以喜昔在少
壯未嘗檢括遠詠老莊之齊物近嘉阮生之放曠怪厚
薄何由而生哀樂何由而至自頃譟張困於逆亂國破
家亡親友凋殘塊然獨處愧憤雲集負杖行吟則百憂
俱至時復相與舉觴對膝破涕為笑推終身之積慘求
數刻之暫歡譬由疾疹彌年而欲以丸銷之耳夫才生
於世而世實須才和氏之璧焉得獨曜於郢握夜光之

珠無緣得玩於隨掌天下之寶固當與天下共之但離
索之日不能不以悵恨爾

齊謝朓與王儉書曰夫所貴天下之士者何其上則悶
景山壑凌氣風霞次則投緡捨築鬱為上佐次則服秦
楚而辭其功振燕魏而逃其賞凡此數輩皆英懿之士
也自茲已降參差萬緒或跡著明晦或才兼默語若桓
譚之褻俗馮衍之忤時北海之凝峭中散之峻絕率以
方寸之情喪不訾之德蓋無取焉若相如之愛奇任節偉

長之淹粹弘遠樂廣融通裴楷夷淡彼四賢者並純神
絕景徇物傷意其慕之而未可以言但心之所暗咫尺
千里志之所符滄洲曖然揣而論之寔山河之不肖者
也

梁簡文帝荅徐摛書曰山濤有云東宮養德而已但今
與古殊時有監撫之務竟不能黜邪進善少助國章獻
可替否仰裨聖政以此慙惶無忘夕惕驅馳五嶺在戎
十年險阻艱難備更之矣觀夫全軀具臣刀筆小吏未

常識山川之形勢介胄之勤勞細民之疾苦風俗之嗜
好高閣之間可求高門之地徒重玉饌羅前黃金在握
足訾粟斯容與自憙亦復言軒義以來一人而已使人
見此良足長歎

梁王僧孺與何遜書曰昔李叟入秦梁生適越猶懷恨
悵且或吟謠況歧路之日將離嚴網辭無可憐罪有不
測所以握手戀戀離別珍重弟愛同郭李淫淫承睫吾
猶抗手分背羞學婦人顧實不肖文質無所抵蓋因在

衣食迫於饑寒非有奇才絕略高談吐一言可以匡俗
振民動一議可以固邦興國全璧歸趙飛矢投燕偃息
藩魏甘卧安郢腦日逐隨月支擁十萬而橫行提五千
而深入將能執珪裂壤功勒景鍾錦繡為衣朱丹被轂
斯蓋大丈夫之志非吾曹之所能及除舊布新清畧方
且抱樂銜圖訟謳有主一旦陪武帳仰文槐備聃佚之
柱下充嚴朱之席上入班九棘出專千里未有躡景追
風奔驟之若此者也蓋基薄墻高塗遙力躋司隸慄慄

思得應弦譬縣尉之獸如離繳之鳥將充庖鼎以餌鷹
鷂雖事異錯皮文非次骨猶復因茲舌杪成此筆端幸
聖王紆好生之施解網祝禽下車泣罪所謂還魄斗極追
風奉高蓋士無賢不肖在朝見嫉女無美惡入宮見妬
外無奔走之友內無彊近之親是以媾市之徒隨相媒
藥一朝捐棄以快怨者之心吁可悲矣蓋先貴後賤古
富今貧李流所以發此哀音雍門所以和其悲曲又迫
以嚴秋殺氣萬物多悲長夜展轉百憂俱至况復露鋪

草色風搖樹影寒蟲夕叫含輕重而同悲秋葉晚傷雜
黃紫而俱墜悲夫豈復得與二三士友抗首接膝履足
差肩搞綺縠之清文談希夷之至道唯吳憑之遇夏馥
范式之值孔嵩慙其留質憐此行乞爾又答江琰書曰
猥惠嘉音用蠲疾首發函伸紙朗若披雲等嶰谷之清
音比洞庭之高曲辭則美矣而擬其非倫譬享海鳥以
醇醪嘉膳栖林狔以崇楹曾拱苟非其實立有驚怖况
復以一離訴棄賓賓淮然豈復能使一筭可輕八厨斯

引且登清漢乍棄黃汗望影析支爭塗再楫其或蹲林
卧石藉卉班荆不過田畯野老漁父樵客酌醴焚枯鳴
鳴相勞羹藜含糗果然滿腹寧有幡旗貴客車馬大賓
獻書盡先賢之德作頌罄前皇之美豈不俯拾青紫坐
享大夫况復詠高梧而賦修竹背清淮而遊長苑留東
閣以從容登石室而高視豈與夫身沒名隕同年而共
毀譽哉

藝文類聚卷二十六

欽定四庫全書

藝文類聚卷二十七

唐 歐陽詢 撰

人部十一 行旅

行旅

爾雅曰征邁行也

易曰天行健又曰牝馬地類行地无疆又曰利有攸往
毛詩曰周大夫行役過故宗廟宮室盡為禾黍彷徨而
不忍去行邁靡靡中心搖搖又曰周公東征三年而歸

我徂東山惓惓不歸我來自東零雨其濛又曰我行其
野茫茫其麥又曰惠而好我攜手同行又曰行道遲遲
中心有違

尚書曰歲二月東巡狩至于岱宗五月南巡狩至于南
岳八月西巡狩至于西岳十有一月北巡狩至于北岳
左氏傳曰不有居者誰守社稷不有行者誰扞牧圉又
曰先王北征五年歲襲其祥祥習乃行又曰行李之往
來共其資糧靡履其可也又曰凡公行告于宗廟反行

飲至舍爵策勲焉禮也又曰君行師從卿行旅從又曰
昔周穆王欲肆其心周行天下將皆必有車轍馬迹焉
禮記曰行則有隨立則有序行則無隨則亂於行

莊子曰黃帝將見大隗於具茨之山方明為馭昌寓參
乘於襄城之野七聖皆迷適遇牧馬童子問塗焉又曰
黃帝遊乎赤水之池登於崑崙之丘又曰適百里者宿
春糧適千里者三月聚糧

家語曰齊人歸女樂魯君觀之三日不朝孔子遂行

穆天子傳曰天子北征絕漳水西征賓于王母天子觴西王母瑤池之上

史記曰禹乘四載隨山刊木山行乘橈泥行乘橈陸行乘車水行乘舟又曰老子居周久之見周之衰乃遂去關關令尹喜曰子將隱矣喜與老子俱之流沙之西又曰秦始皇至雲夢望祀虞舜於九疑浮江下觀丹陽至錢塘臨浙江上會稽祭大禹望於南海傍海北至琅琊漢書曰武帝行幸雍遂北出蕭關厯獨鹿鳴澤自代而

還又曰行幸至甘泉宮賓禮外國客又行幸東海獲赤
鴈又武帝南巡至盛唐祀虞帝於九疑祭天柱山自潯
陽浮江斬蛟江中遂北至琅邪傍海而還所過名山大
川又曰張騫為郎募使月支匈奴留之十餘年騫持漢
節不失西走大宛抵康居傳至大月支王從月支至大
夏窮河源廣地萬里九譯致殊俗威德遍於四海

詩古詩曰驅車遠行役悠悠涉長道四顧何茫茫東風
搖百草所遇無故物焉得不速老

魏文帝詩曰漫漫秋夜長烈烈北風涼展轉不能寐披
衣起彷徨俯視清水波仰看明月光鬱鬱多愁思綿綿
思故鄉願飛安得翼欲濟河無梁又於明律作詩曰遙
送山上亭皎皎雲間星遠望使心懷遊子戀所生驅車
出北門遙望河陽城

魏陳王曹植雜詩曰悠悠遠行客去家千餘里出亦無
所之入亦無所止浮雲翳日光悲風動地起又曰游魚
潛淥水翔鸞薄天飛始出嚴霜結今來白露稀

魏阮瑀詩曰臨川多悲風秋日苦清涼客子易為戚感
此用哀傷攬衣起躑躅上觀心與房三星守故次明月
未收光雞鳴當何時朝晨尚未央還坐長嘆息憂心安
可忘又曰我行自凜秋季冬乃來歸置酒高堂上友朋
集光輝念當復離別涉路險且夷思慮益惆悵淚下霑
裳衣

晉王讚詩曰朔風動秋草邊馬有歸心昔往倉庚鳴今
來蟋蟀吟人情懷舊鄉客鳥思故林

晉張協詩曰述職投邊城羈束戎旅間下車如昨日望
舒三五圓流波戀舊浦行雲思故山

晉陸機赴洛詩曰總轡登長路嗚咽辭密親借問子何
為世網嬰我身永嘆遵北渚遺思結南津又曰遠遊越
山川山川脩且廣振策涉崇丘按轡遵平莽夕息抱景
寐朝徂銜思往又尸鄉亭詩曰東遊觀鞏洛逍遙丘墓
間秋草蔓長柯寒木入雲烟發軔有夙宴思駕無愚賢
晉湛方生帆入南湖詩曰彭蠡紀三江廬岳主衆阜白

沙淨川路青松蔚巖首此水何時流此山何時有人運
互推遷茲器獨長久悠悠宇宙中古今迭先後又還都
帆詩曰高岳萬丈峻長湖千里清白沙窮年潔林松冬
夏青水無暫停流木有千載貞寤言賦新詩忽忘羈客
情

晉成公綏詩曰洋洋熊耳流巍巍伊闕山高岡碣崔嵬
雙阜夾長川素石何磷磷水禽何翩翩遠涉許潁路顧
思邈綿綿鬱陶懷所親引領情緬然

宋陶潛赴假還江陵夜行塗口作詩曰閑居三十載遂
與塵事冥詩書敦夙好園林無俗情叩枻新秋月臨流
別友生涼風起將夕夜景湛虛明

宋謝靈運入東道路詩曰整駕辭金門命旅惟詰朝懷
居顧歸雲指塗沂行飈屬值清明節榮華感和韶陵隰
繁綠杞墟圓粲紅桃嘒嘒鳴顰方雖纖纖麥垂苗隱軫邑
里密綿邈江海遼滿目皆古事心賞貴所高魯連謝千
金延州權去朝行路既經見願言寄吟謠又之郡發都

詩曰迷職期蘭署理棹變金素秋岸沉夕陰火吳團朝
露辛苦誰為情遊子值頽暮生幸休明時親蒙英達顧
空班趙氏璧徒乖魏王瓠從來漸二紀始得傍歸路將
窮山海迹永絕賞心悟又發石首城詩曰白珪尚可磨
斯言易為緇雖抱中孚爻猶勞貝錦詩寸心若不亮微
命察如絲日月垂光景成貸遂兼茲出宿薄京畿晨裝
搏曾颺重經平生別再與朋知辭故山日已遠風波豈
還時遙遙萬里帆茫茫終何之欽聖若旦暮懷賢亦淒

其皎皎明發心不為歲寒欺又七里瀨詩曰孤客傷逝
湍徒旅苦奔峭石淺水潺湲日落山照曜又初往新安
桐廬口詩曰感節良已深懷古亦云思不有千里棹孰
伸百代意既及冷風善又即秋水駛江山共開曠雲日
相照媚景夕羣物清對玩咸可憇又夜發石關亭詩曰
隨山踰千里浮谿將十夕鳥歸息舟楫星闌命行役亭
亭曉月映冷冷朝露滴又彭蠡口詩曰春晚綠野秀巖
高白雲屯千念集日夜萬感盈朝昏攀崖照石鏡牽葉

入松門又初發入南城詩曰弄波不輟手玩景豈停目
雖未登雲峰且以歡水宿又往臨川郡發石頭城詩曰
越海陵三山遊湘歷九疑欽聖若旦暮懷賢亦淒其
宋顏延之北使至洛詩曰振楫發吳州秣馬陵楚山塗
出梁宋郊道由周鄭間前登陽城路旦夕望三川伊洛
絕津濟臺館無尺椽空階多巢穴城闕生雲煙

宋鮑照還都道中詩曰昨夜宿南陵今旦入蘆洲客行
惜日月崩波不可留侵星赴早路畢景逐前儔登艫眺

淮甸掩泣望荊州絕目盡平原時見遠烟浮又從臨海
王西鎮發新亭詩曰客行有苦樂但問客何行攀龍不
待翼附驥絕塵冥梁珪分楚牧羽鷁指全荊狐兔懷窟
志犬馬戀主情又登黃鶴圻詩曰適郢無東轅過夏有
西浮三崖隱丹墜九派引蒼流淚竹感湘別荆珠懷漢
遊又還都在路詩曰夕聽江上波遠極千里目寒煙警
窮谿爽氣起喬木又至竹里詩曰複澗隱松聲重崖伏
雲色君子樹令名細人効命力不見長波水清濁俱不

息

齊劉繪入琵琶峽望積布磯詩曰江山信多美此地最
為神以茲峯石懸重在芳樹春照爛虹蜺雜交錯錦繡
陳却瞻了非向前觀已復新翠微上虧景青莎下拂津
齊謝朓和劉繪琵琶峽望積布磯詩曰昔餘侍君子歷
此遊荆漢山川隔舊賞朋僚多雨散惆悵懷昔踐髣髴
得殊觀頽紫共彬駁雲錦相凌亂又晚登三山望京邑
詩曰灞涘望長安河陽視京縣白日麗飛甍參差皆可

見餘霞散成綺澄江靜如練喧鳥覆春洲雜英滿芳甸
又休沐重還道中詩曰還邛歌賦似休汝車騎非霸池
不可別伊川難重遠汀葭稍靡靡江葉復依依田鵲遠
相叫沙鳩忽爭飛雲端楚山見林表吳岫微歲華春有
酒初服偃郊扉

齊孔稚珪旦發青林詩曰孤征越清江遊子悲路長二
旬倏已滿三千渺未央草雜今古色巖留冬夏霜寄懷
中山舊舉酒莫相忘

齊劉琨上湘度琵琶磯詩曰茲山挺異萼孤起秀雲中
陂池激楚浪紛紜絕宛風煙峰晦如畫寒水清若空
顏鷗舞白流亂葉飛紅

梁簡文帝經琵琶峽詩曰百嶺相迂蔽千崖共隱天橫
峰時礙水斜岸或通川

梁孝元帝經巴陵行部伍詩曰涉江望行旅金鉦問綵
游水際含天色虹光入浪浮柳條恒拂岸花氣盡燠舟
叢林多故社單戍有危樓

梁范雲述行詩曰振策出燕代驅車背朔并翩翩朱蓋
轉蕭蕭良馬鳴

梁劉孝綽還渡浙江詩曰季秋弦望後輕寒朝夕殊商
人泣紈扇客子夢羅襦憂方自難遣况復阻川隅日暮
愁雲合繞樹噪寒鳥濛漠江烟上蒼茫沙嶼蕪解纜辭
東越接舳鵲西徂懸帆似馳驥飛棹若驚鳧言歸遊俠
窟方從冠蓋衢又夕逗繁昌浦詩曰日入江風靜安波
似天流暮煙生遠路夕鳥赴前洲又月半夜泊鵲尾詩

日客行三五夜息棹隱中洲月光隨浪動山影逐波流
梁劉孝儀帆渡吉陽洲詩曰揚帆乘浪華噪鼓揚風力
近樹條而遐遙山俄已逼欲比驚龍掣將頓陽鳥翼客
行悲道遠唯須前路極

梁劉孝威帆渡吉陽洲詩曰江潮凌晚急鉦鼓候晨催
幸息榜人唱聊望高帆開聯村條忽盡循汀俄頃廻疑
是傍洲退似覺前山來將與圖南競誰云勞汭洄

梁江洪詩曰日沒風光靜遠山深無雲潮落晚洲出浪

罷沙成文挾琴上高岸望月彈明君去家未千里斷絕
悲離羣

梁吳筠酬鮑畿詩曰振棹出江湄依依望九疑欲謁蒼
梧帝過問沅湘姬折荷縫作蓋落羽紡成絲吾行別有
意不為君道之又憶費昶詩曰皎皎日將上獵獵起微
風山沒清波內帆在浮雲中直趣珠星北斜開碧海東
故人若思我當念離根蓬又使廬陵詩曰悵然不自悟
端憂坐漠漠風急雁毛斷冰堅馬迹落客子饑寒多江

上衣裝薄何當報恩罷驅車還北郭

梁王僧孺中川長望詩曰長川杳難即四望四無極安
流寧可值憤風方未息危帆渡中懸孤光岩下晃岸際
樹難辨雲中鳥易識莫恨東復西誰知迂且直故鄉相
思者當春受顏色獨寫千行淚誰同萬里憶

梁何遜度連圻詩曰客子行行倦年光處處華石蒲生
促節岩樹落高花又還度五洲詩曰睠言還九派迴艫
出五洲蕭散烟霞晚清淒江漢秋沙汀暮寂寂蘆岸夕

脩脩又富陽浦口和朗上人詩曰客心愁日暮徙倚空
望歸山煙歛樹色江水映霞輝獨鶴凌風逝雙鳬出浪
飛故鄉千餘里茲夕寒無衣

梁虞騫尋沈刺史至嵎亭詩曰命楫尋嘉會信次厯山
原捫天上雲紉礬石下雷奔澄潭寫度鳥空嶺應鳴猿
榜歌唱將夕商子處方昏

梁王筠遊望詩曰晨登黃馬坡遙望白龍堆風威盡撩
折路險車輪摧

梁朱超泊巴陵詩曰月夜三江靜雲霧四邊收淤泥不
通挽寒浦劣客舟迴風折長草輕冰斷細流古村空烈
樹荒戍久無樓

梁庾肩吾舟中寒望詩曰日暮敝舫舟曾冰合駛流雪
照齊君履寒入楚王裘

周王褒始發宿亭詩曰送人亭上別被馬攄中嘶漠漠
村煙起離離樹齊落星侵曉沒殘月半山低又和趙
王途中詩曰飄飄映車幕出沒望連旗度雲還翊陣迴

風即送師峽路沙如月山峰石似眉村桃拂紅粉岸柳
被青絲錦城遙可望迴鞍念此詩

周庾信將命使北始渡瓜步江詩曰校尉始辭國樓船
欲渡河輜軒臨磧岨旌節映江沱觀濤想帷蓋爭長憶
干戈雖同燕市泣猶聽趙津歌又入彭城館詩曰襄君
前建國項氏昔稜威鵠飛傷楚戰雞鳴悲漢園年代殊
氓俗風雲更盛衰水流浮磬動山喧雙翟飛夏餘花欲
盡秋盡燕將稀槐庭垂綠穗蓮浦落紅衣又詩曰飛蓬

損腰帶秋鬢落容顏寄言舊相識知余生入關

陳陰鏗和傅郎歲暮還湘州詩曰蒼茫歲欲晚辛苦客
方行大江靜猶浪扁舟獨且征棠枯絳葉盡蘆凍白花
輕戍人寒不望沙禽迴未驚湘波各深淺空軫念歸情
又晚泊五洲詩曰客行逢日暮結纜晚洲中戍樓因碣
險村路入江窮水隨雲渡黑山帶日歸紅遙然一柱觀
欲輕千里風又夜發詩曰夜江霧裏濶新月迥中明溜
舳唯識火驚鳧但聽聲勞者時歌榜愁人數問更

賦漢劉歆遂初賦曰歆好左氏春秋欲立於學官時諸
儒不聽歆乃移書太常責讓深切為朝廷大臣所非求
出補吏後徙五原太守志意不得經歷故晉之域感今
思古遂作斯賦得玄武之嘉兆守五原之烽燧馳大行
之岩防入天井之喬關望亭燧之皎皎飛旗幟之翩翩
迴百里之無家路修遠之綿綿勒漳寒而固守奮武靈
之精誠據趙奢之策慮威謀完乎金城

後漢班彪北征賦曰紛吾去此舊都兮騑遲遲以歷茲

遂舒節以遠逝兮指安定以為期飛雲霧之杳杳沙積
雪之皚皚遊子悲其故鄉兮心愴悵以傷懷攬余涕之於
邑兮哀生民之多故諒時運之所為兮永伊鬱其誰訴
後漢曹世叔妻班氏東征賦曰惟永初之有七兮余隨
子乎東征時孟春之吉日兮撰良辰而將行遂去故而
就新兮志愴悵而懷悲明發曙而不寐心遲遲而有違
亂曰君子之思必成文兮盡各言志慕古人兮

後漢蔡邕述行賦曰余有行於京洛遭淫雨之經時塗

述遭其蹇連潦汙滯而為灾聊弘慮以存古宣幽情而屬詞行遊目以南望覽太室之威靈顧大河于北垠觀河洛之始并牽陵阿以登降赴偃師而精勤壯田橫之奉首義二士之夾墳

魏崔琰述初賦曰琰性頑口訥至二十九粗關書傳聞北海有鄭徵君者當世名儒遂往造焉道由齊都而作述初賦曰有鄭氏之高訓吾將往乎發矇灑余髮乎蘭池振余珮於清風望高竊以亟征戾衡門而造止覲游

夏之莪莪聽大猷之篇記高洪崖之耿介羨安期之長
生登川山以永望臨洞浦之廣溟左揚波於暘谷右濯
岸於濛汜運混元以升降與三光而終始蓬萊蔚其潛
興瀛壺崛以駢羅列金臺之蹇產方玉闕之嵯峨

晉陸機行思賦曰背洛浦之遙遙浮黃川之裔裔遵河
曲以悠遠觀通流之所會啓石門而東縈沿汴渠其如
帶託飄風之習習冒沈雲之藹藹商秋肅其發節玄雲
霈而垂陰涼氣淒其薄體零雨鬱而下淫覩川禽之遵

渚見山鳥之歸林揮清波以濯羽翳綠葉而弄音行彌
久而情勞塗愈近而思深羨品物以獨感悲綢繆而在
心嗟逝官之永久年荏苒而厯茲越河山而託景眇四
載而遠期孰歸寧之弗樂獨抱感而弗怡又思歸賦曰
余以元康六年冬取急歸而王師外征職典中兵與聞
軍政懼兵革未息宿願有違懷歸之思憤而成篇節運
代序四氣相催寒風肅殺白露霑衣嗟行邁之彌留感
時逝而懷悲彼離思之在人恒戚戚而無歡悲緣情以

自誘憂觸物而生端晝輟食而發憤宵假寐而興言羨
歸鴻以矯首挹谷風而如蘭歲靡靡而薄暮心悠悠而
增楚風霏霏而入室響泠泠而愁予既遨遊於川汜亦
改駕乎山林伊我思之沈鬱愴感物而增深歎隨風而
上逝涕承纓而下尋冀王事之暇豫庶歸寧之有時候
涼風而警策指孟冬而為期願靈暉之促景相立表以
望之

晉潘岳西征賦曰歲次玄枵月旅蕤賓潘子馮軾西征

自京徂秦皇鑒揆余之忠誠俄令余以末班杖疲人於
西夏攜老幼而入關余乃越平樂過街郵秣馬臯門稅
駕西周澡孝水而濯纓嘉善名而在茲登峭坂之威夷
仰崇嶺之嵯峨臯託墳於南陵文違風於北阿躡函谷
之重阻看天險之衿帶迹諸侯之勇怯筭嬴氏之利害
或開關以延敵競遁逃而奔竄發閭鄉而警策遡黃卷
而濟潼眺華岳之陰崖覲高掌之遺蹤倦狹路之迫隘
軌崎嶇以低仰蹈秦郊而始闢豁真塏以宏壯黃壤千

里沃野彌望華實芬敷桑麻條暢邪界囊斜右濱沂隴
寶鷄前鳴甘泉後涌面終南而背雲陽跨平原而連嶠
冢九峻截薛太一龍嵒吐清風之颼戾納歸雲之鬱蒼
南有玄灞素滻湯井溫谷北有清渭濁涇蘭池周曲浸
決鄭白之渠漕引淮海之粟林茂有鄴之竹山挺藍田
之玉履犬戎之侵地疾幽后之詭惑舉偽烽以沮衆淫
嬖褒以縱慝軍敗戲水之上身死驪山之北異哉秦始
皇之為君也傾天下以厚葬自開闢而未聞匠人勞而

弗圖俾生理以報勤外罹西楚之禍內受牧豎之焚語
曰行無禮必自及此非效歟乾坤以有親可久君子以
厚德載物夫漢高之興也非徒聰明神武豁達大度而
已乃實慎終追遠篤誠款愛澤靡不漸恩無不逮率土
且猶不遺而況於鄰里乎而況於卿士乎於斯時也乃
摹寫舊豐製造新邑故社易置枌榆遷立街衢如一庭
宇相襲渾鷄犬而亂放各識家而競入籍舍怒於鴻門
沛跼蹐而來王范謀害而弗許陰授劒以約莊搆白刃

以萬舞危冬葉之待霜爾乃階長樂登未央汎太液凌
建章榮馭娑而款駘盪輜杙詣而轢承光徘徊桂宮惆
悵柏梁驚雉雉於臺陂狐兔窟於殿傍何黍苗之離離
而予思之茫茫

晉郭璞流寓賦曰戒雞晨而星發至猗氏而方曉觀屋
落之隳殘顧但見乎丘棗嗟城池之不固何人物之希
少越南山之高嶺修焦丘之微路駭斯徑之峻絕感王
陽而增懼詰朝發於解池辰中暨乎河北思此縣之舊

名蓋曩日之魏國詠詩人之流歌信風土之險刻背茲
邑之迥逝何險難之多歷望陝城於南涯存虢氏之疆
場實我姓之攸出邈有懷乎乃迹陟函谷之高關壯斯
勢之險固過王城之丘壟想穀洛之合鬪惡王靈之壅
流竒子喬之輕舉遊華輦而永懷乃凭軾以寓目思文
公之所營蓋成周之墟域

晉張載叙行賦曰歲大荒之孟夏余將往乎蜀都脂輕
車而秣馬循路軌以西徂朝發軔于京宇兮夕予宿於

穀洛踐有周之舊墟槐丘荒以寥廓讚王孫於北門問
九鼎於東郭寔公旦之所卜曷斯水之瀆薄入函谷而
長驅歷新安之鹵阜行逶迤以登降涉二嶠之重阻經
欽岑之險巖想姬文之避雨出潼關以迴逝仰華岳之
崔嵬勤大禹之疏導豁龍門之洞開舍予車以步趾玩
卉木之璀璨翳青青之長松蔭肅肅之高柞緣阻岑之
絕崖蹈偏梁之懸閣石壁立以切天岌嵒隗其欲落超
陽平而越白水稍幽愛以迴深秉重巒之百層轉木末

於九岑浮雲起於轂下零雨集於麓林上昭晰以清陽
下杳冥而晝陰聞山鳥之晨鳴聽玄猿之夜吟雖處者
之所樂嗟寂寞而愁予心造劍門之崇關路盤曲以晦
謁山崢嶸以峻狹仰青天其如帶兼習坎之重固形東
隘以要害宜乾坤之分域將隔絕乎內外

晉袁宏東征賦曰惟吾生於末運託一葉於鄧林顧微
軀之眇眇若絕響之遺音壯公瑾之明達吐不世之奇
策握百勝於崇朝靡雲旗於赤壁三光一舉而參分四

海指麾而中隔過武昌而逍遙登樊山以流盼訪遺老
以證往乃西鄂之舊縣曩有吳之初基升員丘而豹變
爾乃出桑洛會通川背彭澤面長泉洲渚迢遞巖岫虛
懸即雲似水望水若天日月出乎波中雲霓生乎浪間
嗟我行之彌留跨晦朔之倏忽風褰林而蕭瑟雲出山
而逢渤向孫氏之南面鑽靈龜以相土模豐鎬之制度
寫河洛之規矩經始郭郭築室葺宇金城萬雉崇墉百
堵君臣有章上下獲叙所以能三分天下而有其文武

到吳都以停舟覽闔閭之餘塵建修城以營郭引通流而發津遠矣吳德舊邦惟新太伯被髮仲雍文身言偃以文學遺風季札以讓國稱仁高節顯於華夏端委行乎海濱

宋謝靈運歸塗賦曰昔文章之士多作行旅賦或欣在觀國或怵在斥徙或述職邦邑或羈役戎陣事由於外興不自已雖高才可推求懷未愜今量分告退反身草澤經塗履運用感其心賦曰承百世之慶靈遇千載之

優渥匪康衢之難踐諒跬步之易局踐寒暑以推換眷
桑梓以緬邈褫簪帶於窮城反巾褐於空谷果歸期於
願言獲素念於思樂於是舟人告辦佇楫在川觀鳥候
風景測圓背海向谿乘潮傍山悽悽送歸慙慙告旋
時旻秋之杪節天既高而物衰雲上騰而雁翔霜下淪
而草腓捨陰漠之舊浦去陽景之芳蕤林承風而飄落
水鑒月而含輝發青田之枉渚逗白岸之空亭路威夷
而詭狀山側背而易形停余舟而淹留搜縉雲之遺迹

漾百里之清潭見千仞之孤石歷古今而長在經盛衰
而不易

宋鮑照遊思賦曰雲遙兮海衝上潮兮送風秋水兮架
浦涼煙兮冒虹暮氣起兮遠岸黑陽精滅兮天際紅波
茫茫兮無底山蓼蓼兮萬重捨堂宇之密親坐江潭而
為客對蒹葭之遂黃視零露之方白鴻晨驚以響湍泉
夜下而鳴石瞻荆吳之遠山望邯鄲之長陌塞風馳兮
邊草飛胡沙起兮雁揚翔雖燕越之異心在禽鳥之同

戚

齊謝朓思歸賦曰余菲薄以固陋受恩靈而不訾拖銀
黃之沃若剖金符之陸離舟未濟而河廣途方遙而馬
疲紛吾生之遊薄彌一紀而厯茲自下車於江海沙青
春而於是時睽索茫而引領望大夏而長思離曲街之
委陋猶寤寐而見之余乃眷言興慕南眺猶然將整歸
轡願受一廛考華城之直陌相洛浦之迴阡於是籬挿
芳槿門拂長楊簷桃春發窻竹夏涼晨露晞而草馥微

風起而樹香恒離居而歲月痛銷落而徒傷

梁簡文帝述羈賦曰奉明后之霑渥將遠述於荆楚歎
雲霞之宵漫對江山之遙阻是時孟夏首節雄風吹甸
晚解纜乎鄉津涕淫淫其若霰舟飄飄而轉遠顧帝都
而裁見遠山碧暮水紅日既晏孰與同雲差莪而出岫
江搖漾而生風奉璽言而遙邁改余玉於江隈遵陽塗
而中正軫悲心其若頽引領京邑瞻望弗遠戀逐雲飛
思隨蓬轉觀江水之寂寥願從流而東反又阻歸賦曰

觀建國之皇王選能官於前古元帝慈而布教豈齊聖
而作輔伊吾人之固陋宅璇漢而自通躡九枝而耀景
總六翮而搏風屬玄玦之啓異逢玉弩之相驚頓天羅
於八表騰雲驅於四溟發伏鼈之雄氣耀策馬之高星
地邇朔場疆鄰北極攏樹饒風胡天少色上月斜臨寒
松遙直雲向山而欲歛雁疲飛而不息何愁緒之交加
豈樹萱與折麻聞繁鉦之韻水聽流風之入笳終知客
遊之阻無解鄉路之賒

梁江淹待罪江南思北歸賦曰惟江南兮邱墟經萬里
兮長蕪帶封狐兮比景連雄虺兮蒼梧當青春而離散
方仲秋而遂徂雲清冷而多緒風蕭條而無端援之吟
兮日光迥狔之啼兮月色寒況北州之賤士為炎上之
流人共魍魎而相偶與蟪蛄而為鄰秋露下兮點劍舄
春苔生兮綴衣巾

梁丘遲還林賦曰爰自京師言歸舊嶺今風古轍每動
寸衷因事而書不覺成卷非謂為文聊記行途所經云

爾太皞弭節祝融聳駕炎鍾汎響青籥靜吹丘子稅轅
畿路總舳川湄褫魂故嶺結夢舊塋揆身世而載懷鏡
古今而興辭驗難停於揚轍昭易改於墨絲匪追舉而
辯命豈適伊而問著擔簦無白璧之想負書無黑豹之
悲纜解山潮首顧京滙仰絳堞之紛迴與素津之容裔
荃撓往來芟蓋經過依稀子陵之釣髣髴滄浪之歌出
入風霞游息雲露階伺禽飛窻高月度踟蹰七教徘徊
五禮永翦帶於關上長緝巾乎林底

梁沈約愍塗賦曰結榜窮渚思臨長嶼情依舊越身經
故楚彼長路之多端伊客心之無緒懼因循而易失悲
由心而難拒此江海之信遼知余思之方阻日淹長浦
風掃聯葭疊雲凝憤廣水騰華聽奔沸於洲嶼望掩暖
乎煙沙依雲邊以知國極鳥道以瞻家免悽愴於羈離
亦殷勤於行路歎余塗之屢蹇冀前芳之可慕

梁張縉南征賦曰歲次姬訾月惟中呂余謁帝於承明
將述職於南楚忽中川而反顧懷舊鄉而延佇沂金牛

之迅渚觀靈濤之雄壯標素嶺乎青壁聳頽文於翠障
跳巨石以驚湍批衝岩而駭浪鏟千尋之峭峯深萬流
之大壑隱日月以蔽虧搏風烟而迴薄崖映川而晃朗
水騰光以倏爍下流湍而洄險上岑崟而將落於是近
睇赭峯遙瞻鵲岸島嶼蒼茫風霜蕭散值時雨之新晴
觀百川之浩汙水泓澄以闇夕山參差而辨旦忽臨睨
於故鄉聊江天其無畔獨向風而舒情塞芳洲而誰玩
於是千流共歸萬嶺分狀清江洗潮平湖夷暢翻光轉

彩出沒搖漾岷山端冢悠遠寂寥青溼赤岬控夕引潮
界飛流於翠薄耿長虹於青霄若夫灌漭川涯曾潭水
府游泳之所往還喧鳴之所攢聚聆寡鶴之偏叫問孤
鴻之幕侶在客行而多思獨傷魂而悽楚

陳沈炯魂歸賦曰值天地之輻裂遭日月之霧虹去父
母之邦國埋形影於胡戎絕君臣而辭骨肉躋厚地而踞
蒼穹抱北思之胡馬望南飛之夕鴻泣霑衿而雜露悲
微吟而帶風履我我之層冰面颼颼之嚴霜去莫教之

所縊過臨川之折軸矧今古之悲涼並攢心而霑袂渡
狹石之欹危跨清津之幽咽雁虛弓而自殞猿叫子而
腸裂歷江漢之逶迤及樊郡之參差望隆中之大宅映
峴首之沉碑乃尋折而歷裔遂經秦而至洛覺高蹈之
清遠見風雲之倏爍何武關之狹隘而漢祖之英雄山
萬重而仰雲霧水百仞而寫蜿蜒去青泥而踰白鹿越
滄水而至青門長卿之賦可想邵平之迹不存咄嗟驪
山之阜惆悵灞陵之園訪軼道之長組拾藍田之璵璠

登未央之北闕望長樂之基址伊太后之所居築旗亭
而成市槐路鬱以三條方塗阻而九軌觀阡陌之遺蹤
實不乖於前史傍直城而北轉臨橫門而左起洎涇泥
之混濁盥渭渚之清波指咸陽而長望何李趙之經過
息甘泉而避暑猶夷壇而清和至誠可以感鬼秉信可
以祈天何精殞而魄散忽魂歸而氣旋解龍驂而見送
走却驛於停傳出向來之大道及初入之山川愛繞朝
之贈策報李陵之別篇淚未悲而自墮語有噎而無宣

書宋鮑照與妹書曰吾自發寒雨而全行日少棧石星
飯結荷水宿以今食時僅及大雷塗登千里日踰一辰
去親為客如何如何因步頓憑觀川陸邀神清渚流
睇方曛東顧三洲之隔西眺九派之分闕地門之絕景
望天際之孤雲南則積山萬狀爭氣負高含霞飲景參
差代雄陵跨長隴前後相屬帶天有匝橫地無窮東則
砥原遠隰亡端靡際寒蓬夕卷古樹雲平旋風四起思
鳥羣歸靜聽無聞極視不見北則陂池潛演湖澤脉通

栖風之鳥水化之蟲以智吞愚因彊捕小號噪驚聒紛
初其中西則迴江永指長波吞合滔滔何窮漫漫安竭
左右青靄表裏紫霄從嶺而西氣盡金光半山以下純
爲黛色借可以神居帝郊鎮控湘漢者也夕景欲沉曉
霧將合孤鶴寒嘯遊鴻遠吟樵蘇一歎舟子再泣誠足
憂悲不可說也

藝文類聚卷二十七